

## AITONA ZAHARRA (\*)

*Donostia, 1990-I-26*

*Jose Antonio Gesalaga "Zaldubi"*

### AITONA ZAHARRA

Doina: Hamalau heriotzearena.

1

Larogei urterekin  
bizi naiz nekean,  
nahiz eta orain arte  
jardun jo-ta-kean,  
bizitzak azkenean  
jarri nau jakean,  
baina azken hobe  
izan zitekean,  
hil arte bizi nahi dut  
Jaunaren pakean.

2

Orain artean ez dut  
izan pobrezarik,  
inoiz pasatu arren  
goibel bajezarik,  
sekula ez dut eman  
ezeren kexarik,  
bizitzak neretzako  
ez du sorpresarik,  
orduen joanerak  
ez bait du presarik.

3

Esnatzean oraindik  
daukagu iluna,  
ta nekez argitzen da  
hurrengo eguna,  
leihotik artizarra  
beti dut laguna,  
isiltasuna bait da  
maite ezaguna,  
izarrak daki elkar  
maitatzen duguna.

4

Seme eta alabak  
hazi eta hezi,  
baina ezkondu ahala  
guztiak berezi,  
orain gure artean  
bada hainbat hesi,  
zahartu naizelako  
dabiltza ihesi,  
horrela bazterterik  
ez nuen merezi.

---

(\*) *Xenpelar* bertso paperen saria. Lehen saria.

5

Nere telefonoa  
hor dago isila,  
nahiz ustezko lagunak  
nik eduki pila,  
erlojuak darama  
pausaje trankila,  
eta ez naiz joango  
heriotzan bila,  
Jaunak nahi duenean  
itzali nadila.

6

Sarritan egoten naiz  
suari begira,  
edo balkoi ertzetik  
aurreko mendira,  
edo bastoiarekin  
jira eta bira,  
baina inor ez dator  
nagoen tokira,  
ni hiltzen naizenean  
etorriko dira.

7

Inor ez zait hurbiltzen  
goxoki ondora,  
eta ahaideak dabiltz  
gerotik gerora,  
nahiz eta nitaz jardun  
ahotik ahora,  
bakardadea sartu  
zait gorputz osora,  
inoiz irrifarrerik  
ezin zait birlora.

8

Denak aspertzen ditut  
nere oroimenez,  
nahiz-ta esanak esan  
asmorik onenez,  
bakardadean nago  
negar itomenez;  
guztiak nere aurka  
aurkitzen direnez,  
arren pakean utzi  
hiltzen gutxienez.

9

Edonon begiradak  
dakuskit zorrotzak,  
non-nahi entzuten ditut  
zurrumurru hotsak,  
bakarrik pasa behar  
momentu mingotsak,  
abegi hobea du  
sarritan arrotzak,  
neure etxean eta  
jan behar nau lotsak.

10

Zahartzaroak egin nau  
tristuraren jabe,  
eta nere pausoak  
mantsoturik daude,  
oraintxe aurkitzen naiz  
bizi pozik gabe,  
non-nahira joan eta  
guztietan sobre...  
bizirik irautea  
bainohiltzea hobel!

*Aitona*